

ماویلر

شعر مجموعه سی (ح.ر. سحر)

بو دفترچه ده چاپ اولموش شعرلرین تاریخی معلوم دگیلدير، اما بو شعرلر بوتونلوگله انقلابدان قاباقکی ایللره عایددير. (۱۳۵۴ دن ۱۳۵۷ یه قده ر)

□ انتشارات فرزانه – روبروی دانشگاه تهران

□ ماویلر

□ حمیده رئیس زاده (ح.ر. سحر)

□ چاپ اول ۱۳۶۵

□ تایپ و آماده سازی برای وب : قاراباغ www.qarabaq.azerblog.com

بوغولان آخشاملار

وارليغيم داغلاردا چنه بنزه يير
گوزه للر تتلينده دنه بنزه يير
غربت پنجه سينده بوغولان آخشام
حسرت ، نيسگيله ، منه بنزه يير

آی باجاسی

گئجه دیر ...
باخیرام آی باجاسیندان
باشقا بیر ماوی گویه
اوردا دا وار ائله بیل:
گئجه یوردون قانا دؤنموش دنیزیندن
نچه بیر غملى بولود
چنلى داغ
قانلى سؤیود
گئجه دیر ...
باخیرام آی باجاسیندان
باشقا بیر ماوی گویه

آند ایچیرم

دالغالی گؤلرینه آند ایچیرم
دامغالی اللرینه آند ایچیرم

□

قویماریق باغلی قالا قوللاریمیز
قورویا گول – بوتامیز ، خوللاریمیز
یئته دوستاق دیبینه یوللاریمیز
باغلانان قوللارینا آند ایچیرم
کسیلن یوللارینا آن ایچیرم

□

قویماریق آل گونشین رنگی سولا
قورخولوق یوردوموزا کؤلگه سالا
چن توتا آرزو یولون ، گؤز قارالا
آغاران تئلرینه آند ایچیرم
چن توتان بئلرینه آند ایچیرم

□

قویماریق غم دنیزی دالغالانا
گتیره تولکو فنلی خلقی جانا
اودوموز اؤزگه اوجاغیندا یانا
سارالان گؤلرینه آند ایچیرم
ساری بولبولرینه آند ایچیرم

□

یازاریق قوچ نبی نین شائلی سؤزون
چالاریق سازدا ائلین جانلی سؤزون
دویاریق خان آرازین قانلی سؤزون
سارالی سئلرینه آند ایچیرم
یارالی ائل لرینه آند ایچیرم

بیر شوشه گولاب کیمی

داغ دایاقلی کوره ک
ابریشم دویغولو اوره ک
دیلہ سیغماز دیلک تک سارسیلماز کولک
دیلہ بیرم
زaman دونگه سینده سولماز گول
محبت گنیش لیگینده کونول
کینه کدریندن کونلو کول
دیلہ بیرم
پولاد تک اراده
بیر شوشه گولاب کیمی ساده انسان
دیلہ بیرم
پاساژ قاباغیندان ، پاساژ قاباغینا چاتماق
ساوالان دایاناجاقلی یاشاماق
چتین یولا یولداش دیلہ بیرم
چتین یولا
یولداش ...

هانسى يوللاردان گليرسن

سيغمايير ايستكلريم منطقلرين ارکانينا
ايسته بير عنوان اولوم ديوانه لر ديوانينا
سن آچان گونددن قاپانميش يوللاري رويالره
مين ديلک ايلمک له نير هر دم کونول دمانينا
هانسى يوللاردان گليرسن گويده اولدوزلار گولور
چن دوشور حسرت قباسيندان باخيش ميدانينا
سن دوننلر باغچاسيندا اکديگيم بير آرزوسان
گنج بئجردين دوشمه دي کولگه ن گوروش ايوانينا
دامجى – دامجى قان داميرکن ، قليبمين پيمانه سى
دالغا – دالغا يوکسلير ميدان وئرير توفانينا
قوى اوره ک دريای عشق اولسون ، بوتون وارليق گمي
قوى چئويرسين دالغالار دونياني قان عمانينا

گۆزله بیر سنی

یورغون گمیچیلر گۆزله بیر سنی
قوندار بئل ایشچیلر
جوان ایشچیلر
یاشاماق حاققیندان پایسیز اؤره ک لر
اوغوشموش ، دایاقسیز سایسیز اؤره ک لر
حسرت گدیگینده گۆزله بیر سنی
سن سیزلیک قورخوسو
(نه دئییم آخی)

...
گۆزله ریم گۆزله بیر
قیناما منی

الینی وئر منه

ائلمین گوللری سولمایان کیمی
دریالار اوسگویه دولمایان کیمی
توتولوب اولمایان کیمی
اوچماقدیر دیلگیم قانات وئر منه

□

غم توزون آپارمیر گوزومون سئلی
سوسدوروب دیلیمی ننه لیک فنلی
دردیمی توکنمز حیات وئر منه

□

چال سازی سسینده سوزومو دئییم
قان رنگین گوسترمز دونومو گئییم
واردیر چارپیشماغا هله لیک هئییم
گئدیرم چنلی یول قیرآت وئر منه

□

جانیملا وارلیغیم ، واریم دیدیشیر
اوخ قالیب سومو کده یارا بیتیشیر
حیاتیم بوش – بوشا باشا یئتیشیر
بو سون گونلریمده ثبات وئر منه

□

قولوما قارداشدان دایاق ایستیرم
دیلیمه ائلیمدن سایاق ایستیرم
دنیزلر توتوملو چاناق ایستیرم
دردیمی یازماغا داوات وئر منه

بیر اووج خاطره

سۆزلرین گۆزلریمه ایل گئجه دن دان تۆره دیر
سنه وورغون اوره گیم قان یئرینه جان تۆره دیر
بیلیمیرم هجرینه دوزمک یئتیره ر وصله منی
نئجه کی داغ دوزومو سینه ده وولقان تۆره دیر
اوتوراق ائيله بیر هجرینده زامان قافله سی
یوخسا اومید وصالین منه درمان تۆره دیر
نییه بیهوده تومارلیر باخیشین گۆزلریمی؟
بو اووندورماق اوره کده یئنی توفان تۆره دیر
سن بیلیرسن کی منیم قلب ده آرامیم یوخ
اودا دوران کیمی غم ساغرینه قان تۆره دیر
دولانیرسان گئجه – گوندوز اوچان افکاریم ایله
خیالیم قلبیمه سندن سر و سامان تۆره دیر
راضی سان گل قونوشاق ، یوخسا دایانما سووشاق
سانماکی دویماماغین عاشیقه افغان تۆره دیر
سن منیم سن ، منی سنسیر قویا بیلمز دوران
بیر اووج خاطره قلبیمده سنه جان تۆره دیر
قلبیمین قات – قاتینا قان کیمی یاتدین ، دئمه دین:
سوروشوم قلبی دنیز توتماغا امکان تۆره دیر؟
قلمیم تنگه گلیر دویقولاری یازماق اوچون
بیر باخیش دالغالارین مین بئله دیوان تۆره دیر
قلمیم چاشدی «سحر» باشلادی دیوانه لیگه
قوی اوجالسین سسی یار شائینه شایان تۆره دیر

کؤچدن قالان دورنا

قوجا آغاج یاواش – یاواش
یارپاقلارین قولاغینا پیچیلدا بیر
یئل ایلہ نیر ، قولاق آسیر
گؤیده بولود فیکره دالیر
بولاق آغیر – آغیر
آخر ،
عشقہ دایاق داغلاریمی توتوب دومان
آرزو بویلو چارداغیمی بیخیب خزان
هردن اورہ ک کیئلہ نیر:
باش گؤتوروب گئدم گرک !
من دئیبرم یانا یانا:
دایان اورہ ک ! دایان اورہ ک !
خزان چاغی اسن یئلین چیلغین لیغین آنلا سایدین
دئمزدین کی گئدک اورہ ک
ایلقاری نئیلہ یک اورہ ک؟
دورنا کیمین کؤچن قوشلار
نہ آنلا بیر خزانلاردا یازی ایتگینلرین سؤزون
یاز قوشلاری گؤرسہ خزان یومار گؤزون
من کی دورنا دئیلم اورہ ک
فیرتینالار ذیروہ سینہ ائلچی اولان
یارپاقلانان تورپاقلارین یولچوسویام
گونشلرین ایچگی سینہ چاناق اورہ ک
دیلک بویلو داغلاریم دایاق اورہ ک
یازا وورغون قوشلار ایلہ آفاق اولما !
گئدر گیلر اورہ گینه قوناق اولما !
من کی سنی ساتمامیشام یالان – یالان دویغولارا
منی یالان سئودالارین دنیزینہ آتما اورہ ک
منی یازا ساتما اورہ ک
هئچ بیلیرسن نہ فیرتینا قوپاجاقدیر
بولاق دؤنوب ، بولانیق سئل اولان زامان
خزانلارین اویانلارین آرزو بویون خزان یئلی بیخاندادا
بیخیلماغا گولہ ر ، دورار
دوروب گینه سینہ گئریب ، اوجالماغا فیکیر قورار
من کی دورنا دئیلم اورہ ک
وارلیغیمی خزان یئلی اولوشگہ دیب

دیلک منی کدرلرین دؤنگه سینده قویوب ، گئدیپ
من نه بیلیم
بلکه ده یاز سورگون اندیب منی خزان تورپاغینا
بلکه باغبان قویمایبیدیر حصارلارین دالداسیندان
بویلاناراق
باخام یازین باغلارینا
بلکه ده او
کؤچدن قالان دورنا منم

ياشلى باخيشلار

كؤريه اللرين بارماقلاريندا
قان قوروياندا
ياشلى باخيشلار
دوستاق يولونا باغلى قالاندا
قورخو اللرى
قالخان قامته تور توخوياندا
گينه ده
سنين قارا باليغين يادىما دوشور

اوساندين سنده آخیردا زهه ر انمیش بولاغلاردان
قانادلارین اوچار – اوچماز کؤچورسن قانلی باغلاردان
اؤزون یولدا گؤزون دالدا کئچیرسن قارلی داغلاردان
تیکانلیقلار دیاریندان اولان کؤکسو یارا بولبول
ائتیمیشدیم کؤچر دورنا ، گئدیرسن سن هارا بولبول؟

گئدیرسن سن گئت دالا باخما ، قاباقلاردان سسین گل‌سین
بولانماز غنچه قانیندان بولاقلاردان سسین گل‌سین
قفسدن جان قوتار سوسما ، اوزاقلاردان سسین گل‌سین
سازین نیسگیلی سیزلانس اوزون دؤندر بورا بولبول
آماندیر قویما یوردون تک سنی غربت یورا بولبول

گئت اوردا سال هارای ، سسلن نه اود دوشدو بورا سؤیله
اسیلدی اللی مین بولبول بوداقلاردان دارا سؤیله
گونش ده ظلمدن سؤندو اوزو اولدو قارا سؤیله
دنن گلدی ائلیم یوردوم بو ظلمت دن زارا بولبول
اوجالمیش ناله نی سازدان دولان سال داغلارا بولبول

آی کیچیلیر

اوزاق ایللر
یاخین گویده
مهربان آی یاریسی نین دالیسینجا دولاناندا
بالیقلی چای قیراغیندا
بالابان چالینان ایللر
آغزیمدا کی ساققیز سئوینج
جیبیمده کی بئش قیرانلیق امنیتیم
یاری گئجه
اوستومو باسدیران اللر
سیگار اییلن قاریشان عاطفه یدی
نه آغزیمدا ساققیزیم وار
نه جیبیمده امنیتیم
نه محبت اییلی یورقان
چای ایچینده
قان ایچیلیر
میندار قوشلار دیمدیگینده
قاش – قاباغلی
اوزاق گویده
آی کیچیلیر
بایقوش اووولتوسو گلیر

اوزمه رم دونیادان ال ، یوخ الده واریمسان منیم
دار دونیادا اولان دار و نداریمسان منیم
دوزدوم ال چاتماز لیغا سندن قالان دونیالاری
تک اوره ک بیلسین گرک گیزلینجه یاریمسان منیم
عشقه سوز وئردیم سینیق پیمانه نی سیندیرمیا
باشقا ایلغار ایلله سارسیلماز قراریمسان منیم
قویما حسرت بوقچاسیندا عشقی پنهان ائیلله بیم
سیغماز هئچ ابعاده گیزلین آشکاریمسان منیم
ذیروه لر آلقیش دییه باش قالدیرر دیدارینا
سن بیل اولدوزلار دایانما افتخاریمسان منیم
هر خیالدا تور قوروب ، شعری شکار ائتمک دئدیم
گوردوم ان گویچک شکاریم ، شاهکاریمسان منیم
سؤیله دین عاشیق کچر دار و نداریندان «سحر»
یوخ آماندیر ! سؤیله مه ! دار و نداریمسان منیم

کدرلی کؤنلومه اودلو نوالردن صلا بسله
منی چنلی اوجا داغلار دالیندان ساز ایلن سسله
دولوبدور سوز ایله سازین
نه دیر عاشیقلره رازین؟
نوالردن یقین دیر کی قالین می بسله بیر سازین
عطش ناقه گئدن سمته
طربدن یول کسیر سازین
اسیر سازین
ابد یوردوندا جانلانمیش نوالردن ازل ایزله
گؤتور سازی غزل بسله
غزلدن گؤزه ل بسله
گینه سؤزلرده بللنمز محبتدن کسرلی بیر اثر گؤستر
گینه سؤزدن بتر گؤستر
دانش سازلان:
صداقت منزلی بوشدور
بو مأویه گئدن بوشدور
سوروش سازدان:
آداملاردا مروت بس نه دن یوخدور؟
گینه آل آرشه نی سازین داماریندا دولاندير چال
گینه بیر پیس زاماندير چال
گینه ظولمت دیاریندا قالان جانلار تالاندير چال
آماندير چال
گینه دوستاق یولوندا باغلی قالمیش گؤزلره خاطر
اوره کلردن قالیب غمباده دونموش سؤزلره خاطر
قارانلیق چنلی یوللاردا طریقی دوزلره خاطر
دومانلی گؤزلره خاطر
سازی سوسدورما دیلندير
سؤزو ساز ایله بللندير
الین آل قان ایله بایراق ائدن انسانلارا خاطر
گنجه گوندوزون اؤترو چیرپیشان آصلانلارا خاطر

یاشیل احساسلی

گینه نیسگیل لچگین سالدی خزان
آچمامیش غنچه لری چالدی خزان
منی ده جایناغینا آلدی خزان
یاشیل احساسلی چمن ساخلا منه

□

یالانا دوزلوگ اوخو ، ائتسه اثر
گول بیتیب ، غنچه گولوب ، آچسا سحر
بیر ده گورکملی اوره ک گورسون اگر
او اوره کلرده وطن ساخلا منه

□

سوزلرین سینه لره کوز قالادار
دویغونو توشگولو کوزدن جالادار
اوندا کی سوز گونشی چالخالادار
سوزده اولدوز کیمی دن ساخلا منه

□

دایاغ عنوانلی داغ آواره سی ام
قارا گونلرده آغ آواره سی ام
بیر گولوشلوگ دوداغ آواره سی ام
غملره قارشى گولن ساخلا منه

□

دنمیرم خوشلوغا یاد ائت ، یادا سال
غم اوئونده آدیمی فریادا سال
منی ده غم بولوشنده آدا سال
بیر اوره ک پایلی محن ساخلا منه

□

بیر دایان ، ذیروه یه دیز قوی گلیرم
سانماکی خسته یم ایز قوی گلیرم
بیر چاناق سوزده دنیز قوی گلیرم
بیر دویوش میدانى چن ساخلا منه

□

اوجالیغلاردا ایزین وار دئییه رک
چیخارام داغلارا یار – یار دئییه رک
گله رم غربت ائوین دار دئییه رک
وطن عنوانلی کفن ساخلا منه

آغلاماق هاواسی

یارین یاری گلیر دییه
داغدا شلاله لر گولور
یار دوداغی گولور دییه
باغداکی لاله لر گولور
یار یاریلان گولور دییه
الده پیاله لر گولور
یار گولورکن
اوزلر گولور
گؤلر گولور
دوداقلاردا سؤلر گولور
هانسی لاله آیاقلانیب؟
آغلاماق هاواسی گلیر

هاچاناچان؟

سارسیلماز داغلارین ذیروہ سین دئدیم
دیزلریم یورولوب بوکولن زامان
لحظه لر اوستونه
گئجه لر بویو
ظولمت قارقیش کیمی تئوکولن زامان
صاباحین ، گونشین جلوه سین دئدیم
سئوگنین گئروشه گلمه سین گرک
هاچاناچان دئمک؟
هاچانا قدر؟

قارا بايراق گنجہ لر

گينه دونيا کیمی باغريم دارالیب
قولا غیم سسده ، گوزوم یولدا قالیب
سيزلايیر ساز کیمی غمدن اوره گیم
هانسی عاشیق اونو حسرتله چالیب؟
کیم آچیب غم قاپی سین وارلیغیما؟
نییه ایستک قاپی سی باغلی قالیب؟
گينه حسرت ، گينه آخشام ، گينه غم
گينه دویغو گولو کوکدن سارالیب
نه دیلک بازلیغی دیر چیلغین اوره ک؟
من اوچون عرصه دونيا دارالیب
یورما یار – یار دئییه رک یار اوره گین
اودا آرز ایسته گينه فیکره دالیب
سحر اولسامدا یالان ، وارلیغیما
قارا بايراق گنجہ لر کؤلگه سالیب

گیله نارین چیچکلی

گول یار پاغین
بولبول سسین
دان اولدوزون
باخیشیلا تومار لاییر
باخیشیلا بوی اوخشاییر
(گینه نارین چیچکلی یازا آلقیش دئین کیمی)
گونش یولون دؤینلره
گؤزلریندن باخیش آدلی
گؤزه ل – گؤزه ل
ایتی – ایتی
حزین حزین
بایاتیلار دالغالانیر
اوره ک ، دویغو ، دیلک یاغیر
نور جالانیر باخیشینین بایداسیندان
گاهدان حتی
گؤزلرینین بولاغیندان
محببتین سوسوز قالمیش گوللرینه
گیله – گیلّه گولاب کیمین سو پایلا ییر
آد آرزوسون سینده کؤهنه نشان کیمین درن
عشقی قبله ائدن ایگیت
گونش یولون گئدن ایگیت

گۆزوم دوشدو تزه آيا
دئديم هلبت گله جکسن
قند اليمدن دوشدو چايا
دئديم يقين گله جکسن

□

اولدوزلاردان نور سوزولور
اوره گيم هئچدن اوزولور
قاب – قاشيق رديف دوزولور
دئيرم داي گله جکسن

□

گوروشوندن پاي اوموشام
گليرسن گل يورولموشام
گينه سوزومده دورموشام
گله جکسن گله جکسن

□

دئيلر كي عشقه داليب
اوزگه سينه شوراه ساليب
گوزلرينده گوزوم قاليب
اینانمیرام ، گله جکسن

□

گلدیم گوردوم سوزلر دوزدو
اوره گيمي کدر اوزدو
سئوينج منه دوداق بوزدو
نه جور دئيم گله جکسن

بو کلک دن کی فلک خلقه قوروب
عشق بوینون گینه حسرتله بوروب
گوروم داغ کیمی قارشیمدا دوروب
منی مندن آبییران آیریلیغی
ریشه مه تیشه ووران آیریلیغی

یار گندیرکن یاریلیر یارلیغیمیز
باشلانیر هجرده بیمارلیغیمیز
بیزه دار دوستاق اولوب وارلیغیمیز
بوردا کی عشق دانیر آیریلیغی
ائل نه دن قبله سانیر آیریلیغی

یاری یاردان آبییرانلار من اولور
بیزه بیز سیزلیگیمیز دوشمن اولور
گوز یاشیم دریالارا دامن اولور
سنل اولوب کاشکی یووام آیریلیغی
دوشمنه قارشی قووام آیریلیغی

قویالار قوت آلام قوللاردان
آبییرام آیریلیغی یوللاران
یازا یاردیم توره دیم خوللاردان
قیرام ارکانی یالان آیریلیغی
یوردوما کؤلگه سالان آیریلیغی

قورخو

لحظه لر بوغاناق
ماویلر توتقون
لحظه لر اوزانیب
ایلله شیر منه
ماویلر قارالیر
دان اوزاقلاشیر
دامجیلار گؤزومده
سئلله شیر منه
گلسه م سحر باشی گله رم – دئدین
آخشام دولوخسانیب
اولما گلمه دین

حسرت یاش اولوب ، گۆزلره دولماخدادی ، دای گل
گۆز یاشلاری آماخدا ، سئل اولماخدادی ، دای گل
هجران تورو دونیانی قفس تک بورویوبدور
دونیا کیمی باغریم دا دارالماخدادی ، دای گل
هجرینده کئچن لحظه لری یانغیلی ساز تک
غم پنجه سی ، آه زخمه سی چالماخدادی ، دای گل
سن سیزلیگه دؤزمک نه سایاق ممکن اولارمیش
دؤزدوم ، دؤزوموم جانیمی آلماخدادی ، دای گل
گل قوی گونشین بایداسی دونیایه جالانسین
باغریمدا قاراللیق ایزی قالماخدادی ، دای گل
سال داغلارا های ، گؤیده بولوتلار دیله گلسین
یارپاق کیمی وارلیق بویو سولماخدادی ، دای گل
یاتماز ، یولونو گۆزلریم اولدوز کیمی گۆزله ر
گۆزلر کؤکو حسرتله سارالماخدادی ، دای گل
هر گون «سحر» آدیملاریوین ماهنی سین ایزله ر
آچمیش سحرین باغری قارالماخدادی ، دای گل

سۆزلر

گنجہ آغیر
گنجہ اوزون
گنجہ باخیشلارا گئییم
فیکره دالیب اوز – اوزومو دیله بیرم:
گلسه گرک اونو دئییم
بونو دئییم

□

ماوی گؤیلر چارشابلارین آچان زمان
ایکی تاققا
ایکی سلام
دویغو گولو ماراقلانیر
کلمه لره آداخلانا
اوره گیمین چیلغین – چیلغین چیرپینماسی
قویمور سۆزلر دوداقلانا

□

گنجہ آغیر
گنجہ اوزون
گنجہ دویغولارا گئییم
نه یی دییم؟
نه یی دییم؟

آغلیا بیلسه یدیم

دایانماغا دیوار
نفس چکمه گه آز – چوخ هاوا
آلشدیرماغا سیگار
سینه مین دردین بیتیرمه که داوا
وار
بونلار دئییر دردیم
گونش یئرینه اولدوزلارا کفایت ائیلیه بیلر دیم
باشیمی چینیه قویوب
آغلیا بیلسه یدیم

گنجہ لر

اؤزومو آلدادیرام ، یوخ منه چاره گنجہ لر
چیگریدیر جان جیگریمدن منی قاره گنجہ لر
من چالیشدیم کدرین دالغالاریلان کنچینم
گلمه دی قان قالاغی غمله قراره گنجہ لر
نه سحر وار ، نه ده دان اولدوزو ایستیر گؤروشه
گؤزلریم باغلی قالیر قانلی غباره گنجہ لر
توتالیم گلدی سحر خیری نه دیر کوللوگومه
ائله کی غم یئلی چارپیر بو دیاره گنجہ لر
یوخو تک سال یادینا ائل – اوبامین شانلی دیلین
چکه لر گر دیلیمیزدن بیزی داره گنجہ لر
دیل دئییل سانکی اوره ک دؤیگو سودور گنج ائلمین
بو کی فریاده گلیر منله دوباره گنجہ لر
دوروب ائل ال – اله وئرسه یاریلار غم سینه سی
بوغولار نور دنیزینده اوزو قاره گنجہ لر
تک قالیب ظولمت الینده ، باغیریب ، سوسما «سحر»!
چکیلر جهد ائله سه ک آیری مداره گنجہ لر

شیرینلر آجی

دؤیونور اوره گیم
دئیینیر دئیر:
یئر غریب ، گؤی غریب ، دام – دیوار غریب
یارپاقلار ساریدیر ، آغاجلار آریق
شیرینلر آجیدیر ، هر نه وار غریب
لحظه لر اوپ – اوزون
دیلکلر سورگون
اولدوزلار اوزونه چئویریپ بؤرکون
بیلیرم ایسته بیر صحبتین اوچون
هایانا چئویریپ ، هایانا چکه
بو چیلغین
سیرلاییر
سنی گؤرمگه

ایتگین اولدوز

سایا – سایا اولدوزلاری
ایتگین اولدوزومدان سوراق ایزله بیردیم
ایلدیریم تک چاخماغیوی گوردوم آنجاق
هانسی سمتہ آخماغیوی گورمه دیم کی
وارلیغیمدان اریش – آج کسه – کسه
آخیب گئتدین
اوره گیمه ساغالماز بیر یارا تاخیب
گوزلریمدن اوپوب گئتدین

□

سن کی گدر گی یدین یولداش!
باری منیم اوره گیمین
زaman توزونا بورونموش قاپیسینا
او قاپی نین
پاخیر باسمیش جفته سینه توخونمایدین
دئمیرم کی ایلن
سوووش!
یولدان کچن

بولودلار اينتظاريندا

توتوشدو آتش بيداده كۈنلۈم شاد اولان يئردە
يىخيلدى كۈنلۈمون اوميد انوى آباد اولان يئردە
سيخيلدى آيرىلىق جايناقلاريندا قان اولان باغريم
توتولدو قوش كيمي بال و پريم آزاد اولان يئردە
اميد وصل ايله دۈزدوم فراق ايامينه هيهات
پوزولدو نام نيشانيم بزم وصله آد اولان يئردە
سارالدى غنچه بختيم بولودلار انتظاريندا
قىريلدى رشته سى اوميديمين ايجاد اولان يئردە
سوروش احواليمي گاهدان اوزاقلاردا قالان يوردوم
اودوزدو وار _ يوخون شاعر قيزين نراد اولان يئردە
سارالدى غصه دن اوزلر ، آغاردى يول دۈين گۈزلر
نه لازيمدير حزين سۈزلر ، «سحر» فرياد اولان يئردە؟

سئوگی

محبت دنیزین
اوره کلر بایداسیلان حاخلامیان
گؤروش هجالارین دوداخلامیان
اولدوزلار سالخیمیندان
منه ایچگی ساخلامیان سئوگی
سنه غریبسه میشم

یانار داغ

دیلہ دیگیم اوجالیقار یاناشیلماز
دوداقلاریم یانا – یانا
دولانیرام زامان یوردون
چاناقلارین ایچی هاوا
یایلیم سسی یاییلماقدا
یاناقلارین سارالماسین یاخینلادی
یاماجلاردا یالتاقلارین یالوارماسی
یورد بویونجا اصلانلارین
باغیرماسی
یایلیم سسی اوجالماقدا
یاییلقلارین قارالماسین یاخینلادی
گینه دولور چاناقلارا
یاخینلاشیر
یواش – یواش
یانار داغا
یاناشماغیم
یاناشماغین
یاناشماقلار

انتظار

اوخونمامیش قالار قاپی
یازیلمامیش بایاتی تک
دئییلمه میش قالار سؤزلر
ساز تئلینه توخونمامیش
زخمه لر تک
دیزه چوکه ر
زaman آددیملاری بیردن
اوره گیمدن کئچن یولدا
چوخ یوبانما

کال کلمه لر

ظولمت بولودو آلیب فضانی
یاغدیرما کدرلی قاری گنتمه
غم بورگه له بیر یئنن زامانی
وئرمه غمه اقتداری گنتمه
داغلار دوماننا دالیر ، دان آغلیر
هونکورتو چالیر اوره ک قان اغلیر
سن سیزلیگه دؤزمه بیر جان ، آغلیر
سن بیل سؤزو عشق تاری گنتمه
حسرت گندیگین گزیب دولانماق
سؤز قوردوقوموز اوجاقدان یانماق
یگانه لر ایچره عشقی دانماق
قویدون بئله بیر قراری ، گنتمه
وارلیق کیتابیندا داغلانان سؤز
سون ماهنیا دوغرو باغلانان گؤز
ای اؤزلوگومو اونوتدوران اؤز
من سیز اوتوروب شکاری گنتمه
ایللرجه دم ایچره فیکره دالماق
کال کلمه لر اوسته کؤرپو سالماق
سندن یارانیر فناده قالماق
ای وارلیغین اعتباری گنتمه
وصلین گولو پرپر اولدو سولدو
بیر لحظه دایان گوروم نه اولدو
آخیر باخیشیم دومانلا دولدو
گور شاد یاغیش ایچره باری گنتمه
هجران قفسی ، خزان هواسی
چیلغین «سحر» عشق مبتلاسی
سن سیز اوزانیر زمان رداسی
گل عمرومو انتمه یاری گنتمه

حسرت

بیر تورکو دیلیمده
بیر سنوینج باخیشیمدا
بیر گولوش دوداغیمدا
اولوشگه دی
آلغیشا اوزالمیش قوللاریم
حسرت له قول بویون اولدو
کیم قویاردیب
اولدوزلاری؟

هانسی گۆز ياشيلا تار لانميش باخيش
گونش حسرتيله گۆيه باغلاندى
گيزلندى آرزولار اولدوزو
سؤندو؟!
هانسی يولدا قالميش گۆز ياشى
آخدى
دنيزه قوشولان غم بولا غينا
دنيزدن آلولو
دالغا داشلاندى؟!
هانسی آه ، سيزلادی يئل قولا غينا
ايييلتى سسينه آييلدى توفان
داغلار سيلكه لندى
گۆى دولوخساندى؟!
هانسی ال اوزولدو عشق اته گيندن
اوره كلر اودلاندى
زامان داياندى؟
بير ماهنى بارداغى چؤندو
جالاندى
بير وارليق چارداغى اوچدو
تالاندى
گئجه دن آيريليب
ظولمت دن قيريب
يوكسلى آرزولار اوجاليغيندان
اولدوزلار قوينوندا
نورا قويلاندى

گنجہ دیواری

یولدا یارپاق
یئرده یارپاق
بوداقلاردا
خولدا یارپاق
باخا – باخا یارپاقلارا
سووشورام
یاخینلاشا – یاخینلاشا
اوره گیمین دؤیونتوسو ...
پنجره زدن گؤزه دیه ن:
پائیز گؤرمه میش لوت آغاج
بولوتلارا بیچیلیمیش گوی
ایری بیر کاج
خزانا تنز اینانمیان
آل – بیلا ، یارپاقلاردیر

یولدا یارپاق
یئرده یارپاق
بوداقلارسیز یئل ده یارپاق
آتوشگه مدن گؤزه دیه ن
گنجہ آدلی ائجا دیوار
گؤزلریمدن باخیشیوین ایزین پوزور
حسرت کؤزو
دامجیلا یاش سوزه ن کیمین
اوره گیمین گؤروش آدلی یازیلارین ریزین پوزور
تورپاقلانان یارپاقلاریز
وارلیقدان ال اوزه ن کیمی
ال اوزموشه م گؤروشوندن

دۇنوم دۇنگە سى

پرپر باخيشلاردان قاندىم
زامان آيرىلىق رنگيدير
گونش
دۇنوم دۇنگە سينده
دولوخساندى

یانار خاطره

کؤزه ر له نیر وورغون اوره کلرده هله
یانماقیوین خاطره سی
سن تورپاغا سیغماز اودسان
بورانلیقدا سارالماز گول
سن اولدوزسان
اوره کلرده آرزی اکه ن
دیلک آینالارین سیله ن
سحرله شن سحرلرین گؤروشونه
ذیروه لر باش قالدیراندا
گونش انیب
نور کوزه سین
بولانمامیش بولاقلاردان دولدوراندا
آرزو بویلو کمانلارین بوی بوخونو گرنه شه ره ک
قارانلیغی اوخلویاندا
سون گنجه نین اولدوزلاری
دیله دیگین جه ال – اله
«آرزو گیل» گنده – گنده
اوره کلرین توشگوسيله
دوشر دیله
اونودولماز آدین سنین
سن تورپاغا سیغماز اودسان
اوره کلرین توشگوسونده باسدیرمیشیق
سنین یانار خاطره وی
سن اولدوزسان

توزاناقلی دونلرده ، اؤزلوگومو ایتیرمیشم
 قارالانمیش یازیلار تک
 زامان یوکو کوره گیمده
 سانا گلمز آیاق ایزی
 آرزی ریزی
 حسرت کؤزو اوره گیمده
 او زامان کی اوره گیمین قاپ – باجاسی
 عاطفه لر توفانیندان سینمامیشدی
 اولدوزلارا آداخلاندیم
 ناغیل دئییب ، ما توشگه می یاتیرداراق
 اولدوز قاشلی اوزوگومو گورمه دیلر
 آرزی خالچاسین توخویان بارماغیمدا
 منی زامان بایداسینا پایلادیلار
 دونلره
 دونلرده ایتنلره
 من سیز منی نئیلیردیلر؟
 اؤزلوگوملن آیریلاراق،
 باخیش پرده سینه بوکدوم
 اولدوزلارین خاطره سین
 پارچالانمیش اوره گیمی
 چیلغین بورانلار سورودو
 اوزاقلیغلار اولکه سینه
 چؤکمز بورانلار بورودو
 گئجه لرین آتوشگه سین
 ایراقلیغلار کؤلگه سینه دالالاندیم
 اولان – قالان دویغولارین ایستی سی لن
 دؤزدوم آجی سویوقلارا
 زامان کئچدی ، دومان کؤچدو
 گؤزوم دوشدو اولدوزلارا
 گئری قاییتدیم یئنی دن
 توزاناقلی تاقچالاردان
 حسرت اییلی بوچالاردان
 ساری یاریاق باغچالاردان
 قاشی دوشموش اوزوگومو،

شیریم – شیریم ، آریلارین خالچالارین،
اوره گیمین پارچالارین،
اؤزلوگومو،
بیغیشدیردیم یولا دوشدوم

صباحین یولو هارداندير؟!